

Romano Weś

Paramisi Romenge ophenenys pelde but bersia rukha te weś i saro kon doj sys dzido. Hara berś daleske tykni pani phendzia te jek ćhaworo:

- Kało! Wdzia pe da kaśt kaj sy pe pani, a me ligirawa tut dur. Te ławyr sweto, te sweto kaj sy but paramisi.

Siunelys Kało łakre gila i kamełys coraz zorałedyr doj te tradeł. Aż jawja ciro kaj beścia pe do kaśt i tradyja paniesa.

Pani nasielys peskre dromenca coraz to sygedyr, a przedariakirdo Kało rykirełys pes syr najzorałedyr kaśtestyr kaj te na wperel te pani.

- Zaligirawa tut te Romano weś- phendzie pani i lija te ophenel:

Hara, hara daleske Romane wurdena terdzionys doj pe racia. Ne kana saro pe sparudzia i jaćsija tylko da ław. Saro pe lija dałestyr syr terno murś - Maćho, tradyja grenca pe targo. Sys zorałes haćkirdo, but gadzie. Skhyniakirdo Maćho hor dywese wygaja forostyr. Kham zageja, syr zarykirdzia pe paś Romano weś, dzia rakirenys pe do śteto gadzie i phenenys, kaj doj mułe Roma strasiakiren.

Ne Maćho na pacielys i pes na darełys. Dykcja kaj nadodziała te kher gił rat, to zrykirdzia pe dre do weś. Kerdzia peske jag, ćhudzia pe i zasucia.

Sys phaś rat abo haredyr, syr dzingade łes saleś bagipena. Dumindzia kaj na tylko jow daj raćkireł. Htyja i geja dre do ryg karyk siunelys bagipen.

– Rakciom myren - dyja godli syr dykcja kaj hacioł jag a paś łestyr Roma.

Sys jone dzia zarakirde kaj na dykte syr Maćho podgeja i pe jekwar wypija jek tuśni moł. Pe jek dykheł syr paś rukha przenasieł terni ćhaj.

- Siuki – dyja godli.

Ćhaj terdzija i zdykcja dre łeskry ryg. Maćho, aż przekhościa jakha bo peske na dopacielys, dumindzia kaj sy mato. Dre dut jagakro ćhaj sys dasawy siukar kaj Maćho hadyja pharo dzi. Pe jekwar zarysija łeske dre siero, dyja dre hera i peja pe ciar. Tasiarła sys siukar i tatoro. Maćho dzingadzia pe phare sieresa. Dykcja pe pestyr. Paś łestyr na sys ni jek śpera pošli tasia.

- Przedykcia pe mange – dumindzia.

Wygeja gił weś, graja sys doj kaj len mekcja, a paś łendyr kuty thuwłolys jag, kaj ła zahaćkirdzia.

- Da saro dyja pe mange sune? Dawa sys suno – phendzia te pe korkoro.

Te kher jawja gił belwel. Holinakro kaj przegeja łeske celo dywes. A muj do ćhakro celo ciro sy łes gił jakha. Beścia pe grestyr i pałe tradyja te weś. Belewel sys podymen ke doja gił,

tylko ciro udziałys but wolnedyr. Pe jekwar pałe dykheł jag hacioł. Dzi zamardzia łeske sygedyr. So sy doj Roma to Siuki sy lenca. To na odradyne a garude pe gił łestyr. Geja dre łengry ryg. Roma sys bešte dzia syr tasia paś jag i bagenys roibnytko gili. Rozdykcia pe, paś ruk sys konś bešto podymen te dziukeł.

- Dziukeł czy manuś – dumindzia Maćho.

Podgeja, phuroro Rom zdykcia pe łestyr. Saleś wašta podyne łeske tuśni molasa. Lija i wypija saro. Jakhenca porodyja Siukunia. Khełetyś joj pasie jag.

- Pi pe sastypen – siundzia.

Maćho pe zasandzia. Geja te khełeł paś łatyr.

- Hoopa! Hoopa!- dełys godli. Kałe jakha Siukiakre hacionys syr cierhenia. Khełenys sygiedyr i sygiedyr. Moł dyja Maćheske dre siero.

Dzingadzija pałe tasiarła. Siero łes dukhałys. Do jek šteto, do jek rukha. Ne pošli patyw na sys śpera.

- Na dawys sune, Siuki daj sys! – sholiniakirdzia pe, kaj pałe dyja pe te maćkireł i na htyłdzia ćha.

– Poziakiren, me tumenge sykaława – phendzia te pe

Jaćhija pałe belwel, a jow pałe jawja te Romano weś . Kana jandzia pesa brainty i habna pe do šteto. Nikon doj na sys. Nadgeja phaś rat ...

- Nikon nani, rysiuław khere – phendzia

- Maćho!

Obdykcia pe pał pestyr, a doj Siuki terdy

- San!?

- Jame sare sam – i sykadzia wastesa pe sarendyr.

Ne a doj sys do manusia kaj dykcia len gił.

- Dadywes me kerawa tumenge patyw – podgeja Maćho te jone.

- Han i pien kicy kamen. Tumenge jandziom.

- Dziestyr pszał des, dziasa łas – odphende łeske.

Kana Maćho na odgeja Siukuniatyr. Khełetyś łasa i coraz to duredyr po kuty oddziałys syr najduredyr Romendyr. Na dur sys łes garudo wurden paś rukha...Ciordzia Maćho Siukunia, wbeścia pe wurden dyja godli pe grendyr i tradyne. Tylko jaga dzianys grenge herendyr, syr denys dre bara.

- Terdziuw so keres, terdziuw – nasienys pał łendyr Roma.

Ne Maćho już odtradyja dur. Dzingawelys pe już dywes syr zatradyja te peskry semenca. Siuki jeszcze siukaredyr sys syr dykcia ła dre dywes. Pe jek Siuki piradzia peskre bare kałe jakha, zdykcia pe Maćhestyr i lija łeske te opchenel:

- Doj dre przekošto weś jaćsija myry semenca, pszała i phania. Hara daleske hyria manuś kaj sys podymen te dziukeł przekościa jamen. I tylko phasie raciatyr mogindziam te dykheł sweto. Dadywes peldy tutyr omekciom do šteto, ne myry semenca doj ćsija!

- Jandawa łen daj – phendzia Maćho

- Hor teł phuw sy łeskro besiben, so kames jamenge te deł rada, to dzia doj dre phaś dywes i doj kaj sys do phuro manuś, sy zahandłe hor dre phuw dziukłane kokały, wyhande łen a kosiben przedziała.

- Kerawa syr phenes - odphendzia Maćho. A kana ćhesa daj a myre pszała tut przyrakhena. Ziarkir aż jaława.

Tradyja doj i lija te handeł. Hanelys hara bo sys łeske pharo. Wyhandzia już but hor i pe jekwar dykheł, kokały dziukłane. Dud khameskro peja pe kokały, rukha kerde łeske drom, dzia syrby te jawen ziakirde pe do ciro.

Dziukeł pe hadyja, wyhtyja i naćcia dur dre weś. Pe jekwar Maćho ractia pe już pe berga a doj sys terdy celo semenca Siukuniakry.

Pani przećsija te opheneł.

– Dawa da weś- sykadzia Kałeske

- Siuki i Maćho pe rakte pałe – pućcia pe Kało

- Dzia, dzia. Maćho lija ła pał romniatyr. A duj semency dołe cirostyr tradenys już pesa pe wesia.